

兩浙輶軒續錄

兩浙輶軒續錄補遺卷二目

姚溥 胡嵩 來珏 成廷楫 俞元祺

章戡功 沈叔培 沈廣震 沈廣開 沈廣大

孫孝楨 沈純中 沈璘森 邵方平 沈楷

唐洪基 許佐衡 洪楹 鄒上驥 許正頤

郭之玖 金日煥 郭廷棟 胡煇 沈錫培

朱聲 姚遠翻 趙沅 趙畹 陳彙芳

黃灃 許松 劉文煒 盧文韶 汪晞

楊鴻達 吳人龍 顧錫鬯 吳輝美 蘇白

沈構堂 徐景熹 齊周南 張守竅 吳龍光

邵祖節 朱心學 葉能 周濱 胡旭

周鼎樞 黃士翮 徐紹基 來益清 馮國佐

朱輅 汪蒼霖 施鎬 邵嗣桂 黃柱

黃槐 黃杜 黃棠 湯燧 吳履基

徐煒 楊澄 胡啟龍 張廷梅 馮鼎延

謝天樞 謝開家 趙然 諸開泉 桂千人

凌世景 朱庚年 吳希鎧 何濟川 馮孚

陳兆熊 吳淦 張培 陶煒 諸以敦

施光輅 王喆 謝嘉玉 姚宏燮 諸以滄

諸以惕 程潮 金世綬 陳祖蕃 孫炎

高樹穎 高樹新 吳錫福 王元鑑 戈溫如

葉燦 謝天桂 陶譽相 范光裕 朱觀謨

王承嘉 吳應世 倪恢 戴王徵 蔡宏勳

兩浙輶軒續錄補遺卷二

督學使者潘衍桐訂

姚

溥

字天如仁和人康熙壬午舉人官景甯教諭

杭郡詩三輯天如好客愛士講學不倦四壁蕭然弗恤也雍正初卒于官士人惜之

盧放洞

一雨滴山翠蕭蕭萬竹森石泉流曲澗風葉戰寒林到此清

涼境能湔煩惱心何當謝塵事結屋傍幽深

胡

嵩

號慎庵海甯人康熙壬午舉人官東陽教諭

州志嵩爲東陽教諭視生徒如子弟訓誨勤密有貧者助以膏火使有所資致力書史故成就者眾

雜詩

冷意在牆角山梅橫一枝清風沁肺腑倒影涵清池我欲折
此花乃爲桃李疑紅顏中去聲世好幽香持遺誰去去復去去

寒雲長相入思

聲

來

珏 字玉峯蕭山人康熙丙戌進士官福建永福知縣

家傳略公宰永福時政簡刑清不勞而理民仰之如慈父母

春日山行

春色連山翠泉香沁落花長吟殊未了攜杖入煙霞

成廷楫

字桂舟號匏亭錢塘人康熙辛卯舉人官澹安教諭著大秀山人集

府志廷楫爲戶科給事中肇毅之孫世其清白少耽讀書謁選得婁縣令尋改教職束書載一瓢而往嘗曰吾無所用于世而匏繫于此吾其以匏顏吾亭乎門弟子胥稱爲匏亭先生生平無留飲盃吟左手引卮右手操不律與到疾書常數千言瓶罄乃止以是終老

宿新昌郭外曉起作

暫息勞薪駐轉蓬詩情比似旅愁濃五更殘月牽歸夢十里荒雞代曉鐘村酒新筍宜客至柴門方啟被雲封道林此地曾高臥赤水丹池知幾重

俞元祺

字貞起仁和人康熙辛丑進士官翰林院編修

府志元祺官獨修以母老不能迎養告歸母歿將免喪猶練冠麻衣晨夕哭不止家人至不忍聞朔望省母墓得寒疾而卒

題王滄洲五經遺墨手卷

三年刻玉計仍迂萬里還鄉夢已無才子文章羈客淚卷中

三十七驪珠

章戡功

字服伯士斐子錢塘諸生

吳煥傳略服伯幼凝重不苟言笑九歲通五經捉筆能文章久困童子試年三十八始受知督學劉公霖榜出歿已四日矣善詩古文纂輯新舊唐書六十二卷尤精繪事惜少存者妻羅氏苦節四十年以弟藻功子爲後

仁王寺

暮景猶懸塔影紅山催人去逐樵風應身土木終逢劫供佛
煙雲已悟空尚覺芒屨愁星礙暫隨鐘鼓學圓通慈顏不動

瞻依久似水琉璃皓月中

沈叔培

字御冷錢塘人著東苑集

季芝曰御冷喜爲駢儷尤長于詩與同郡毛先舒周臣吉李式玉等善稱八子父希畢官粵西以抗直忤當事中以危法御冷徒步入都營解得脫

城南烏

城南南樓禿老烏歸飛啞啞引其雛仰頭看人低哺食一顧一步鼓兩翼朝啄暮啄願早飛雌長雄鳴各南北老烏胸中意悽惻不如毛短口黃常在側

沈廣震

字武定謙從孫仁和人

桂芳橋

市橋遺故宅耆舊尙傳聞蟾魄應流影虹腰欲駕雲土風存樸略估舶任紛紜憑弔吾曹在晴川又夕曛

沈廣開 字龍文一字天門聖昭子
仁和諸生著天門遺草

晚涼

塵襟當晚滌倒景上簾微靜領一庭竹不知風滿衣倦螢花
底坐歸鳥月邊飛心羨澄波寂分涼入素幃

沈廣大

字虎文謙
孫仁和人

初夏晚步

綠樹陰陰四月天撩人詩在夕陽邊鐘傳小院僧初定門掩
孤村蠶正眠度嶺白雲閒似我出牆新竹淡于煙短橋西畔
娟娟月自照歸人柳下懸

孫孝楨

字世求治
子仁和人

胡上秋興

幽居叢竹裏落日照柴荆曳杖看流水時聞好鳥鳴寒花催

客鬢遠樹黯秋城何處彈琴者還深思古情

沈純中

字穆如仁和人
著梅軒偶刻

杭郡詩三輯穆如著有愛日堂
文鈔嘗與修康熙朝浙江通志

游桐塢

山館習靜久喟然傷離襟良友日以遠誰能同幽尋白雲暮
蒼山斜陽耀楓林肅肅飛鴻盡蒼蒼嵐霧侵且乘獨往與無
爲勞寸心振袂躡幽蹤理策還登臨連山驟回合層崖有岨
嶽舉目窺鳥過傾耳聆猿吟石仄流易奔竹密溪常陰延賞
興不淺覽物意已深終當謝氛垢散髮臥高岑

千金池柬佺亭大師

每愛支公隱飄然興獨偏煙寒數畝竹香散一池蓮地僻無
行徑橋低礙刺船蘆花灘上月夜夜滿前川

沈璘森 字采珍仁
和歲貢

河樓雜詩

清溪遶閣漲痕高滑笏春波跨板橋昨日剛過寒食節估船
吹笛雨瀟瀟

荻芽短短水平初隔岸人家一帶疏日午漁舟三兩泊楊花
風急賣銀魚

邵方平 號眞庵奏平弟仁
和歲貢候選知縣

毛奇齡撰墓誌君當幼時父翼雙公爲歲禱朝名士課
君學曉鐘初動遽以杖叩掩君起樓問默識所授然後
入愿詢諸所習汎應如響以故出試輒冠軍十八補諸
生十九食餼越二十年當康熙丁巳以歲貢補正白旗
官學教習
用知縣

贈曉巖和尚

門掩琅玕煙靄斜消除人世幾年華多應不謝攢眉客許入

閒庭數落花

剝落苔痕靜者居手翻貝葉靜鐘魚我來問道頻揮麈每到

桐陰月上初

沈

楷字步宣號凝齋仁利歲貢
官石門訓導著樂志堂藁

杭郡詩三輯凝齋爲應潛齋高
足弟子年七十八卒于石門

和郁子簡臣詠懷原韻

已識浮生幻由來似旅居典衣謀一醉鼓枻度三餘閒洗池
邊墨類抽架上書素心期不至殘燭夜窗虛

唐洪基

字子翼
仁和人

中秋讌集同潘夏珠沈宏宣王東曙王孝先作

閒庭竹露月流光此夕論詩樂未央雲散碧空常五色花霏
清夜有餘香銜杯金谷憐朋盍授簡梁園任客狂已見參旗

橫屋角玉簫何處度霓裳

許佐衡

字仲平
海甯人

府志佐衡母病急刲股進之愈兄弟三人佐衡與兄承衡以遺產數十畝讓幼弟邑令以孝友旌其門

臨平

近遊亦難別去去意如何不及春波綠高堂白髮多

洪

楹

字築巖新城廩貢官金華教諭著種學山齋集

留別常山諸同學

亂峯深處且登樓太末山河踞上游地近市囂偏爽塏人敦古處愈風流清言自得如蘭侶醜酒欣逢伐木儔無奈驪歌催就道衢江落日一扁舟

鄒上驥

字子靜餘姚諸生

詠志

季子方入秦行李何蕭蕭范叔當走魏意氣亦無聊一旦登
華屋談讌凌雲霄升沈會有數大化常天喬離離秋實小習
習春風飄夙齡負奇志墳典窺黃姚陟岵學就荒陟岵裘復
凋父母生男兒譬如蘭與椒歎息同衰草秋風鳴寒條帝鄉
不可期終夜以飄飄起見東方明朝霞生斗杓

許正頤

字廷廉號養齋天台歲貢

青獅庵

嶺上多精舍青獅景獨幽千盤叢棘路萬仞架虛樓巨石畫
眠虎蒼松晴挂蚪讀書長擁褐六月似深秋

郭之玖

字金山號毅庵金華人

探梅書所遇

一徑踏殘雪前邨探早梅沿溪得鄰叟倚杖共徘徊借問歸

何處西山訪道來老僧出行藥日暮不曾迴

金日煥

字仲章一字復白蘭溪附貢官瑞安訓導

讀正學編

經許秦燒道不灰儒家體用此中該有基方許徐營室無土
何由可築臺徑路幸維先覺啟工夫端藉此心裁當時一綫
延吾婺可認庖羲肇畫來

郭廷棟

字英偉東陽人

晨起題齋壁

行年二十七尙屬可畏時抱命苟不榮所遇徒參差草堂逗
宿雨花階屢游絲一病懸春夏形枯神亦疲彼蒼誠何心桔
我非渴飢頓然要以死得不心嗟咨支牀用揮涕緘詩寄所

思

人生天地閒一長亦可錄借問我何爲函書不能讀營生夙
所鄙圖名志彌蹙標已諒不高混迹遂成俗廢棄及壯年際
此病斷續易占否極泰卦示剝而復天苟假我年姑緩窮途
哭

胡

煇

字又乾號質夫仁和人雍正甲辰進士官陝西狄道知縣

府志煇初任四川長甯縣值烏蒙用兵時芻蕘備糗糧
殫精瘁神恆廢寢食尋改知狄道性耿介不肯伺意旨
與知府不協遂被劾大吏素器重之聘
主舉蘭講席一時多所成就以親老歸

夏日訪後僕夫泉同人分韻

散步得幽境近在北山阿種竹開清泉指說瑪瑙坡隱隱地
脈通轉徙來雲窩修綆試汲古如聞滄浪歌天宇忽澄朗方
暑殊清和共入招提徑參差古木多僊源自澂澈萬派滋駢
羅山僧爲我言盈盈只舊科或者神所爲視此古井波邈矣

中庸子消息夫如何

沈錫培

字屋裁仁和人雍正甲辰副貢官四川夾江知縣

越王祠祀諸臣詩

十一賢豪配祀崇古祠瞻拜識羣雄諸臣已就吞吳業偉績長留霸越功合比魚游欣得水不須烏盡歎藏弓潔陳俎豆稱殷禮江左君臣意氣通

朱

聲

號惺齋海甯人雍正己酉舉人著惺齋詩彙

許淮祥曰惺齋先生少負才名未冠登賢書卽應閩闈同考之聘卒於武林途次年僅二十有四

橋李別同年沈德隅時德隅新抱失恃之痛余旣憐之兼以自傷故作此以贈

送君維舟河之側白日無光忽西匿蕭蕭勁風生異響漫漫浮雲黯行色古稱會合不可常何用臨歧重太息惟子煢煢

新失恃我亦先年遭慘刻劬勞鞠育恩難量欲酬萬一嗟未
得人生到此天甯論痛深創鉅何終極我從親歷倍憐君君
今自悼應我惻兩人相對共悲辛不獨傷離淚沾臆

姚遠翹

字羽豐號素山錢塘人雍
正己酉副貢官刑部郎中

府志遠翹初官武義教諭以善於訓迪舉卓異擢米脂
令俗多溺女遠翹反覆勘諭兼設十家相糾之法俗頓
革縣境接鄂多斯部落故事預給籽糧後多逋負遠翹
酌歲豐歉令分年遞徵遂完積累調知華陰縣東鄉
三河口為河渭洛所交匯庚午秋溢西鄉山水復暴漲
遠翹方在臺站儲時西師芻蕘日不能以供億誤民
事馳赴振郵全活以萬計繕城垣建雲臺書院縣人勒
石頌焉後補淮安分司海口舊有五園河為南北六塘
河出海尾閘淤久矣創議濬復身廁畚鍤開通四十
五里復疏北運鹽河民便之擢刑部郎中告養歸
杭世駿華岳志序李衛公上西嶽書乃好事者誣衛公
而為之碑刻凡三種一在潞州崇甯間刻一在滕縣紹
興間刻而西撤廟刻最後素山令華陰時以
其事近誣詞旨悖慢推而碎之亦快事也

招里中同康熙甲申生者胡桐峯汪柯山槐堂陳摩村

姚躋堂及余宴於承華堂以順治元年所製銀杯命
兒子奉以壽客摩村槐堂斐然有作子續賡一章

熙朝至治百禩餘年和人壽樂里閭太平耆老日燕聚往往
晨夕鳴瓊琚况復

子歸

恩獨被閒居日侍慈顏喜同歌擊壤集嘉賓舊好新知皆同
里同里還教生亦同龐眉皓髮前賢風或辭圭組身永逸或
耽泉石情彌沖不才亦與後塵步雲鶴羣中一野鷺問年旣
得生齒齊古來嘉會今重遇草堂尊酒卜日開惠然勝侶欣
同來嗜古何用癸乙卣侈陳不貴山雲疊舊藏紫芝銀鑿落
穉兒擎出同年簫捧卮行酒壽眾賓交歡一一當筵酌良工
製就銘詞新款識

天朝第一春入手摩挲傳視徧先後推數三甲申藉茲良會
娛堂北板輿長奉躋壽域願歌君子頌樂胥此讌縣縣無爽
忒元豐同甲垂令名吳興六老餘光榮今茲六老更同甲比
事千古差難爭推厥由來歸

聖治耆英佇見人中瑞餘齒休教歲月催閒身盡出

君王賜自今遊屐聯芳蹤春花秋月頻過從吳山之巔湖水
曲襄羊樂志同扶筇風流尙可繼八社歌詠昇平安綠野下
里陳辭未足稱盛事差堪補風雅

趙

沅

字語水號芷畦平陽人雍
正乙卯拔貢著賣餅集

古道

紅塵飛不到黃葉落如鋪此徑原非捷緣溪不厭紆樵歌聲
欲滿社飲醉須扶卻憶桃源裏披尋路已無

薄暮

寒山清徹骨新月淡生眉暮色蒼然至孤鴻何所之人煙多
地著客意似天涯此景難攜得吾歸竟與誰

感秋

涼風自西北大地變秋容山意如僧淡人情向菊濃新愁疑
有約舊夢了無蹤親友誰相問裁詩答夜蛩

趙

晚字蘭圃號芳
谷錢唐人

題杭董浦寄巢

風雅明時見老成居然才望匹西京飄飄司馬凌雲氣嶽嶽
朱游折檻名花韻午晴看自別松聲夜靜聽逾清題詩先寄
山中鶴便擬煙霞託此生

陳彙芳

號嘯菴
錢唐人

題朱鹿田刻曲集

章安舊是神仙窟水部來游香靄開高下點頭華頂石青紅
炫眼怪松山詩瓢繫處春剛半芒屨穿將路幾灣定有一花
開五葉此中好與證無邊

杖藜到處可投龕刻曲周遭性頗耽李白昔曾迷枕席王喬
今忽當伽藍驚湍挾雨峯頭下怪樹擎雲日腳含卻笑興公
遙作賦瓊樓玉闕僅虛探

黃

洪字濛江號學癡鍾子
仁和人著未歸葉

楊振鐫曰先生嘗自題其吟藁云秉志以剛負氣以直
教子一經交友三益非曰能詩但解塗抹遣之子孫幸
存吾拙所爲詩氣
格迥上不落恆蹊

關山道中早發

膈膈膊膊雞翅鳴僕夫催駕又早發露花落地凝寒霜雁字

橫空叫殘月

許

松號蒔庭
仁和人

杭郡詩續輯蒔庭時從厲樊榭張雨游迪誠
夫汪筮人游多唱和之作詩載樊榭集中

坐韜光飛雨軒作

撰杖入淨域塵垢無纖毫竹陰翳殘暑佛香遠煩囂石龍噴
泠泠中蓄萬斛濤乍聽疑秋霽久滴訝春槽邂逅逢勝侶高
談興更豪濯纓可終老媿未解天叟

雨中汎舟北郭看花

緬想桃源境皋亭彷彿同招朋尋曲渚蕩槩入芳叢雨過山
如黛花多水盡紅迷津何處問雞鳴綠蘿中

劉文煒

字青韜仁
和諸生

杭郡詩續輯青韜性孤迥爲文奇崛排慕不諧于時家
故豐後中落以授徒爲生計旣而患疴羸問疾者至則

于臥榻上談詩文尚妮
妮不倦卒年三十有八

春雨和韻

鶯老花殘欲送春，疏風密雨復兼旬。
十年事攪愁人耳，三月寒欺病客身。
江燕補巢黏絮溼，溪魚分子漾波新。
只應同泛扁舟去，紫笠青蓑不厭頻。

秋日湖上

蓴絲牽碧滿湖浮，漠漠寒煙望裏收。
十里枯荷雙鷺雨，兩隄衰柳一蟬秋。
白雲鐘斷僧歸寺，黃葉詩成客倚樓。
猶有留人餘興在，數聲短笛起漁舟。

盧文韶

字召音號勉廬文韶弟仁和諸生

梁紹王曰勉廬年未四十右腕不能作書遂絕意進取
搜采羣書校讐精審晚年家益貧而志益勵士林重之

阮貞母沈孺人壽詩

沈氏有好女自幼嫻內則阮姓得聞之求爲烈宏室行媒旣
知名兩家各相得相期俱長成于歸薦榛栗何圖婦未歸佳
兒忽已卒女聞暗吞聲長跪父母側身已許阮之死矢靡
忒父母涕泗言汝志誠愴惻吾其送汝歸奔喪修婦職上堂
拜姑嫜當窗理蠶織兄于本猶子立後如己出死者可復生
生者無媿色天地有完人古今欽淑德下里感作歌敷陳豈
文飾采風請勿遺永爲巾幗式

注

原名隨字海荷號定齋仁和人著重趼集

陳鴻寶序略海荷力學而居于時嘗執經孝毅先生爲人寡言笑喜飲酒閒學爲詩不求工正以味別而成趣所著有青雲紀游草王丙初學詩海荷舊人詩餘文集

孤山懷林處士

半山斜照滿林煙處士歸來伴鶴眠水白天空成一夢梅花

香裏老殘年

楊鶴達

字大瀛號蓮峯餘杭人著亦寄軒詩文集四十卷

孫樹禮曰蓮峯先生別著有垂露庵雜記八卷檢前阮錄第十七卷目錄曾列揚宏遠揚景通與先生三人名而詩俱漏載今從杭郡詩輯補錄先生一詩惜于宏遠景通二君詩則仍無可采補也

冬經南塘

望中衰柳尚婆娑湖淥初凝水不波
村店酒香留客少弋陽腔俚聚人多
紅連數里霜林老翠斂千峯夕照醅
天地茫茫成底事獨來亭畔一高歌

吳人龍

一名知非字際飛義烏諸生著靜修集

宗忠簡公祠下作

祠在縣學側

檀州初不守金師竟長驅瞬息城下盟
辱國當何如昂昂想簡公一兵當萬夫
誓與賊俱死敢說君庸愚吾謀既弗用
友

此七尺軀徒聞悲痛聲過河尙三呼公歿六百載英氣揚天
衢美名永不滅無乃公所吁微生託同里清酒薦一壺再拜
淚暗零夕陽澹歸途

顧錫鬯

字孝威號瓚圃仁和人乾隆丙辰進士官江西廣饒九南道著擬碧堂集

乾隆辛未西湖

行宮隨差引

見恭賦一律

佳氣蔥蔥瑞靄生

天顏覲處五雲迎嵐圍瑪瑙千峯峙滌展玻璃一水平爭扈
翠華依鷺序喜隨仙仗聽鶯聲
鑾輿偶過春光洽十里歡呼仰

聖明

吳輝美

字璋陸號椒峯義烏人乾隆丙辰舉人

金華詩續錄椒峯登賢書方弱冠年未及壯歲取得知縣以雅意經籍辭不出日手一編尤嗜易卒年八十餘揖雅堂詩話隋書地理志稱義烏風俗澄清道教隆洽逮乎趙宋宗公挺生忠義之氣千載如見此邦人士有所規範宜後起之多秀也今椒峯入詠搜詩亦具微意亟爲采錄以示法戒

八詠樓弔沈休文

寥天響孤鶴萬木零秋霜石峽最清迴雲溪深渺茫嗟哉武康沈受命來斯邦文采眞富美四聲況能詳芳蘭不自惜置之荆榛旁狐兔甘與走末路何狷狷噩夢故可駭心二斯召殃試與溯當年反覆雲雨忙喚作沈家令冠帶安可常文人不可爲志士當慨慷

蘇

白字竹泉號二隄仁和人乾隆戊午舉人

焦山

在縣治西南四十里

茲山亦名焦儻與鎮江并其高一千丈峯勢特蒼勁舉手捫
參辰未欲侈題詠會當逢飛仙肉相不敢請

沈構堂

字念穀號思劬璘森孫
仁和人乾隆戊午舉人

初夏齋居

棟花風裏訊餘寒翠溼平蕪露乍乾往日酒人存漸少中年
詩境進偏難雷驚晚筍穿苔砌風送殘英上竹闌門外綠陰
如海闊幾多煙月付漁竿

徐景熹

字驂兩仁和人乾隆己
未進士官福建鹽法道

李桓傳略公性好學初以治易充副貢乾隆丙辰與兄
翼燕同舉京兆試旋成進士入詞垣越五年

上幸

翰林院宴館閣諸臣
詩用柏梁體公有日星胸回錦繡腸之句頗稱

命賦

旨嗣

御貢院製詩四章詞臣恭和公復與上選明年充會試

純廟

求疆吏才品以公動舊子弟
同考官所薦拔皆知名士時

特授

福建鹽法道而公固體弱到官急報稱凡所以恤體商

足民食裕國課者知無不爲爲無不力雖督深倚之益

勉自奮勵忘其勞
苦未久遂卒於官

恭和

御製翰林院宴畢

駕幸貢院七律四首元韻

養士掄才撫五辰

翠華曉日出重闈風檐晷度雙丸速樺燭光添五夜辛南省
探花曾有使秋林攀桂更多人紛綸經術邀知遇試問誰如
井大春

文昌列宿耀三台雲漢爲章肯育才匣有祥金歸識者匱多
美玉尙沾哉驂駟自見馳驅穩桃李還欣爛漫開珍重書升
成

曠典棘闈喜迓

六龍來

展翼皆期九萬搏原知天祿不須干名經千佛題非易健翮
三秋奮未難抱璞久應邀巨眼席珍果識重儒官風雲多士
霑

恩渥感激

滋培滴淚殘

鎖院森嚴夜柝沈撚髭抱膝費清吟璠璣可有良工琢杞梓
眞邀大澤深桂蘂芬時環寶樹杏花開處上春林

作人樸樸逢

熙運簡在均宜報

聖心

齊周南

字首風號河洲天台人乾隆辛酉舉人官慈谿教諭著東野吟瑞草堂彙

天台詩存河洲先生為息園侍郎長兄同懷五人共業曹源書屋學行為諸弟李適安方文朝見其辛酉行卷歎為舉業正宗入都寫侍郎邸與周石帆杭大宗張南

詔試

華胡雲持帶酬唱甚相得會中書大學士任公蘭枝素稔先生欲為之地先生既以

述涉黃綠引嫌適弟世南又登賢書計借入都因念垂白恣堂慨然曰得失有命奈何久離膝下遂歸外舅張

貞品率湖北蘄水挾與借比至剔積弊革陋規道播頌聲張喜謂曰我固知爾非書癡乾隆辛未歲大稔道壅

俞旨

民賴以甦用知縣改慈谿教諭復以老乞休猶元元銘

槩不輟著有春秋三傳質疑五卷綱目質疑四卷年九十一卒子式唐

欽旌

純孝論者謂先生名位雖不逮侍郎而歸則過之弟圖南道南並

有交名
古井次胡雲持韻

古井泉深深滿鰲石髮碧銀牀缺不修恐礙龍出入豈無眾

所趨轆轤引不盈渴不飲盜泉吾甯此用汲

于忠肅墓

復辟功彈徐石冠誰思句曲荷艱難守都不渡南朝馬監國
翻回北漠鑾平地風波千古恨滿天陰暝一時寒無端亦有
金牌事對鎖隄橋兩淚看

張守栻

字賜履號養齋浦江人乾隆辛酉拔貢官山東淄川縣丞

家傳略守栻性仁恕任淄川時不妄鞭扑署邑象能平反冤獄三年告歸年八十餘與同邑張檢討爲二老會謁鄭康成祠

大儒不世有有爲天下宗豈但式齊魯四海歸陶鎔繁詞跨
百萬經傳羅其胸希賢藉羽翼柄道嚴垣墉公車結主知尊
爲大司農經師與經神推轂交喁喁慨自尾秦坑圖書燼煙
烽劫灰此明滅微言長駁駘至漢靜餘燄覺世開昏瞶大道
不淪陷鴻儒蹈中庸翳彼肆喧囂叩缶嗤黃鐘迄今億斯年

狎獲尋遺蹤脫非後鄭資其將誰適從殘碑篆鳥迹故閣敲
塵封願得禮瓣香勿徒慕千鍾春露已飄警秋霜漸滋濃尙
惟書帶草滿眼披蔥龍

吳龍光

字彥和號斗墟錢塘人乾隆乙丑明通榜官順天南路同知著實田堂遺稟

吳顥傳略斗墟長嗣豫軒名大受幸任邱時余長子岸往游幕中得見寶田堂稟皆殘缺漫滅就其可讀者錄十餘章以歸聞尙有定林詩草則未之見也

偶成

欲化莊生夢休嗟顏子貧簞瓢且安我存歿竟誰人破膽觀
書史勞心問鬼神沙鷗小天地隨意可沈淪

贈嚴幾庵

鼎是和梅後臺仍列柏時早知心似水聞說鬢成絲鄉月于
今滿人風與古期爲言裘敝盡揀策更何之

邵祖節

字濟川號椒石錢塘人乾隆
庚辰進士官翰林院庶吉士

貽皇甫翼滄

君才竟不偶吾道豈全孤
詩句剗青竹秋聲滿碧梧
與酣搖五嶽賦就麗三都
切玉昆吾鐵誰知價最殊

寒山舊廬和石上張文端公原韻

此閒別是一林邱
不出門庭足勝游
盡借好山圍四壁
得緣危磴上層樓
仙蹤化鶴雲常駐
佳句磨厓翠欲流
便擬款扉尋舊迹
江湖環望破新愁

朱心學

號劭亭仁和人乾隆戊辰
進士官河南湯陰知縣

杭郡詩輯劭亭柯柯若處子而文豪氣猛
不類其爲人性篤于孝親亡以哀慕死

揚州客感

懷忠獨過梅花嶺
此地都知閣部名
今日園亭滿溪上
十年

書劔託浮生倚閭有母嗟違養投筆何時得請纓未報君親
且流落酒闌月墮不勝情

葉

字位三號蓉城仁和人乾隆
庚午舉人官湖北來鳳知縣

重任蕉溪告歸留別諸生

再至山城又幾年重逢竹馬意惓然無才敢說輕車便爲學
須知一簣先列坐諸生都受教攀轅赤子媿稱賢西湖歸去
惟琴鶴可有新詩江上傳

周

濱號青崖一號活溪蕭山人乾
隆辛未進士著活溪詩序

種菱

凌苗新養得生計付江天插篠初分界牽菱欲礙船種宜歸
水利息可半秋田客有山居者西風待饋鮮

胡

旭字升陽德清人乾隆壬申舉人
官兩淮鹽大使著樹談堂遺詩

沈嘉春序略先生之學研思古今羅靈蛇之珠抱荆山之璧北走燕齊南遊粵黔江山靈秀風物雄華足遂所經供其憑眺爲詩如波濤之怒奔如龍蛇之鬥舞鍾金琢玉鏗然古音

夏日有懷魯齋

朱景榮時序灌木變鳴禽薰風自南來亭午當槐陰不見晨夕侶悠然橫素琴別鶴渺湖海獨處誰與尋摘蘭堪盈把采藥復滿襟豈不念持贈愁懷各滯淫

山左道中卽事

我行山之東乞兒擁如蜂攀轅不肯放哀聲上蒼穹問渠果何欲所求一文足一文亦安爲不絕命如續薄命螻蟻輕遲速理亦平但免今日死焉知明日生君不見溝中之瘠何纍纍今爲乞鬼昨乞兒嗚呼東家生牛笑西家死驢哭老弱餓死何人埋眈眈狗彘啖其肉

海上謠

海鵬壓雲雲不開閭闔門低天風哀殷殷填填轟如雷黃濤
倒捲鮫宮摧須臾湧現銀樓臺金支翠旗集蓬萊龍女獻珠
裂蚌胎鯉魚赤尾金光迴三山不動高崔嵬徐市采藥安在
哉男女至今顏如孩秦橋月白交徘徊

舟發張家灣

驛路三千里歸來興已闌天開南國遠秋入北河寒日落迴
颿急風高破浪難扁舟獨飄泊翹首是長安

大峪

一徑天開據要衝屈蟠大峪勢如龍犬牙錯襍圍三市鳥道
縈紆入萬重北望朝宗連岱氣南來鎖鑰壯齊封征輶到此
分風壤迴首淮雲獨倚筇

周鼎樞

字凝甫，號榆所，嘉善人。乾隆癸酉舉人。官陝西武功。知縣著清聞齋詩存。

大挑入二等例

文田傳略：公年二十三登賢書，丙戌大挑入二等例。得學職，不赴。充景山官學教習，期滿引。

見仍

南巡公承輯天竺志，以勞薦。明年調選，得桐柏知縣。薄

文典瞻詳，整富陽童文格，新建裘文達兩公嘗亟稱之。

尤工書，然艱於一第，及爲令，復不竟其施。公音嘶，每不能疾言，術者謂公屢躓以此。

聽秣陵吳思立談明故宮遺蹟

吳生讀史笥貯腹，千載滄桑話更僕。門對西風輦道斜，南朝

宮闕餘平陸，父老能知長樂鐘。

城內某坊有巨鐘，陷地，識之者曰：此故長樂鐘也。

行

人不識，連昌竹長千古寺足亭臺舊，內斜陽饒苜蓿。

明大內遺址，今

爲教場牧地。

聞有樓如結綺高，幸無井類胭脂辱。荒主般遊多墜

鈿，神功不戰少遺鏃。黑山昔日走桑乾，青犢無心戀函谷。徒

言半壁擁飛龍，那計中原誰得鹿。南頓諸劉大業乖，瑯琊一

馬天心屬天心縱未厭昏德長城自壞嗟誰贖吏道多端及
爛羊時事一朝成覆餗覆餗方誇廟算優江淮門戶不須愁
萬枝燈火雙棲燕阮大鍼製春燈謎燕子箋二傳奇爲教坊供奉樂夢遍蘭春與菊
秋擅長鐵撥嬌元夜跋扈戈船據上游劫火自來焚劔舄寢
園猶聽哭松楸崇禎中孝陵夜哭者不一閨氣餘分安足論沙蟲猿鶴何
逡巡故臣筐篚功名在祠部性牢禮數新卯金遺像空隆準
明祖廟本朝置戶奉祠遺像許人瞻仰鶉火成功記伏辰從知蕩蕩乾坤德爲
念寥寥文謝名淒涼宮殿當時簿寂寞邱墟何氏民昇平相
遇談興替好醉金陵萬斛春

自江干發棹抵柯城得詩五首

定山何處是一望渺難窮江折潮崩岸舟輕帆飽風雲飛樹
影外客思雁聲中回首增惆悵飄飄信短篷

日落遠山紫扁舟一葉輕烏當煙際沒人在鏡中行乍得乘
風力旋聽破浪聲漫愁殘照盡新月渡頭生

水到巖灘下澄泓分外清客懷隨雨散鷗隊狎波輕木落四
山瘦風微一鏡平釣臺屢經過愧我但知名

山鳥如迎客茲來記我曾灘聲紛似雨雁影貫如繩荻浦半
規月漁灣一點燈客懷嗟縷結濁酒可能勝

橋袖沿溪好臨灘住客艤乍驚風檝檝還聽水淙淙野燒迷
孤岫夕陽紅半江柯城知不遠吟思那能降

二月十六日同三衢諸子蓮溪泛月

蓮溪之水清可掬素娥冉冉波心浴主人留客具扁舟載得
春醪一百斛扁舟邀月泛滄浪風吹枳花滿谿香長空雲淨
碧如洗琉璃萬頃涵清光水晶宮裏天初曙馮夷擊鼓瘦蛟

舞驪龍鼯睡夢不成三寸領珠乍吞吐船頭有客吹長篴船
尾美人坐鼓瑟羣公潑倒玉山頽我醉猶能盡一石舉頭顧
兔已西傾揮手喝之使倒行狂歌不盡尊前興玉壺重瀉葡
萄春人生良會能幾度世上浮名如朝露少年行樂須及時
青春肯爲紅顏駐

東臯

東臯去歲稻苗枯南陌今年麥有無野鳥不知年又歉猶從
竹裏喚提壺

春暮錢鐸石先生過聽鐘山房寓齋偕謝金圃年丈箕
谷家兄步至憫忠寺看海棠就買蘇靈芝寶塔頌碑
因憶壬申癸酉閒先子在都與諸公游賞事泫然有

感

黃鸝三請語可憑木棉衣換單袂勝客來偕遊鄰寺近主僂
許諾同聲鷹出院相於步驟往入門已覺流霞蒸芳菲半吐
曲欄護照耀不定雙眸凝此閒海棠勝賞足諸公椽筆吟情
仍因思往事忽生痛頓使佳景翻成惘回頭詎忍花下立憩
足聊向廊閒凭搨碑有聲相與聽厯階追視爭先登流傳舊
數唐代物漫漶誰把蘇公矜巋然寶塔藏舍利法書足重非
關僧分攜省識敵素絹摩抄甯尙隨荒塍先人當時嗜金石
雅游曾此偕賓朋竭來寒食念登墓使我清淚流盈升小桃
辭枝尙畹晚老柳當道都鬢鬢江湖滿眼愁乍隔輦紅溷跡
慙無能歸來行篋檢手澤敝廬卻想松濤澄

黃士翮

字飛吳義烏人
乾隆癸酉副貢

家傳略士翮雍正己酉拔貢登乾隆癸酉副
榜掌教華川書院一時知名士多出其門

梅花橋石佛

橋在金華府東門外

岑嶽石碕巖飛橋架巖口且走赤松門迹在梅花右誰歟手
剡鑿佛象儼跟肘宅諸石垠塢本無乃忽有虛懷浩蕩開生
氣模胡久洪波振絕壑疊浪敲衰柳得毋龍罔象欲鞭城郭
走厭勝古有法彈壓期不苟遂此鎮以神捍災可藉手嶽峙
迴流清帖妥雄濤吼但克奠厥居其功可勿朽苔蝕復沙侵
焉事問誰某俗徒不曉事况說土木偶象教自掀騰神功在
高厚

徐紹基

字石船以烜子仁和人乾隆丙子舉人官淮安海防河務同知著石船詩草

俞樾傳略公爲文敬公曾孫以舉人萊仕廣西爲東蘭州知州任滿遷安徽安慶同知旋丁父憂服闋補官淮安時江南全盛淮上爲河工人員所聚風俗奢侈公法晏子國書示儉之意務爲省約著有備海紀要行世

登黃樓懷蘇學士

奎宿歸天上人閒尙有樓江山迷蜀道襟帶鎖淮流落日荒
城晚酸風畫角收黃皮湖上塔勞我夢杭州

來益清

字龍源蕭山人乾隆丁丑進士官福建清流知縣

家傳略公善屬文好沈思刻慮在官視民如子庭可張羅去之日謚思載道至今勿衰

縣齋寫懷

一尺文書子細看斯民生死洞觀難四更重復挑燈坐魂夢
今宵恐未安

馮國佐

字東巖錢塘諸生

泊小姑塘

去國二千里西江此日游曉看山寺古晚泊野田秋岸柳懷
何妥江花憶沈侯小舟空泛泛何處寄離愁

朱

輅

字沛霖錢塘人

江上曉發

積霧蔽歸程，殘鐘帶雨聲。山歌來別浦，潮信轉荒城。旅夢村雞喚，征塵驛吏迎。勞勞殊未息，千古此棋枰。

汪蒼霖

號易堂錢塘人官江甯江甯縣丞

洪亮吉日易堂少走京師客甯郡王邸甚久春秋佳日與吾黨數子尋花賦詩以爲樂事晚得卑官以忤于大吏不獲一遷豈非詩人賦命例丁窮薄者歟

次韻敬亭立秋日南郊泛舟之作

送客清秋動晚風，一鉤新月碧溪東。芳洲杜若銷魂地，莫使

尊前酒盞空。

施

鎬字京來號愚堂錢塘貢生著愚堂詩草

萬福傳略愚堂獲交杭墓浦汪槐堂吳甌亭汪機圖諸老輩借成成山丁誠叔曹荔帷徐秋竹皇甫古尊結詩社與余交尤密

東坡先生像硯歌

東坡先生不可見乃見先生所寶端州之石硯青花白葉生
古香入手便覺雙目眩書窗費我幾摩挲歷盡劫塵色逾倩
姜公君弼感贈胎墨林日對先生面先生與硯永結鄰硯與
先生託深眷隱拙主人盛文物素心花下招名彥上下遙遙
幾百年梅花介壽椒漿奠吁嗟乎世間富貴奚所誇何如寶
此千古不磨紫霞片

天甯寺僧過訪

寂寞虛堂下殘僧叩竹扉香飄曼陀雨綠照水田衣詩思同
雲活閒情逐鳥飛幾時尋古寺相對可忘機

梅家橋春望

翠寫煙螺郭外招吟鞦三五上河橋分茶山戶供官買掘筍

林僧待客燒花落祇因連夜雨水深合長一田苗明朝再作
南湖約踏徧重茵路未遙

邵嗣桂

字晴巖仁和諸生
官江蘇鎮洋知縣

客齋志感

恆河觀日試追尋六十三年不異今閱世每詣前輩語讀書
方見古人心老從殷鐵還千祿學愧姚崇解作箴獨客長沙
感秋晚不堪東望淚沾襟

黃

柱字載斯號砥庵仁和諸
生著曲江吟草十二卷

沈鶴曰砥庵居東鄉家饒極極產藏書甚富每招朋好
旬日一集分韻賦詩把酒爲樂著有長山雜誌二卷

和沈桐溪沈庵探桂之作

風流祇合沈郎耽不管吟腰瘦不堪仙桂自邀名士賞倚才
誰作老生談色香妙諦閒中徹水月禪心靜裏參清福輸君

消受徧未須捷徑羨終南

黃

槐 字蔭三號植堂
柱弟仁和人

偕沈桐溪砥庵兄遊孤舟山桐溪有詩卽次其韻

佳木蔥蘢鬱阜暉結廬深處俗塵稀
心空諸有蒲團穩道解
虛無粟顆微徑僻客分山靄入林深
鳥帶澗雲飛桐溪居士
耽禪悅每過精藍樂忘歸

黃

杜 字景張號蘅洲又
號小牧仁和人

吳振械曰小牧受業于龍泓丁隱君之門善畫竹石嘗
寫竹一幅獻之隱君報以詩曰
泖露捎煙寫竹枝殷勤
爲索老夫詩恨無耘老臨溪屋
相看官奴把燭時卒年二十九

同人觀龍興寺石幢分韻

文戰偶一挫佳興成鈍置寂寞臥書帷
疲疴實爲累有客登
然來招我游蕭寺臘短春將回如風
藹然被喜無城市喧頗

得清淨意相將素心同石幢搜故事手捫兼口讀拯苦識大
義歎息迦文言悲願果備至如何簪紱流逐逐事名利藉口
飢渴語虛張實盡棄乃知波利賢斯事誠足記

黃

榮字思蔭號蔭
人仁和人

揚振鐫曰思蔭爲小牧從弟亦從龍泓學精于繪事并
得鐵筆之傳年二十三歿兄弟才雋玉樹同埋可勝太
息

題小牧兄墨竹

籜龍嘯夕西風瘦渭川綠曉秋波皺亭亭秀色搖霜紋晴霏
不動湘江雲吾家小牧有奇癖喜展緗縑揮醉墨琅玕千畝
足撐腸杈枒萬个旋吐臆如低忽昂孤幹橫與酣落筆忘經
營寫成挂向茅屋下蒼莽咫尺連青冥

湯

燧

字仲炎號古巢粵棠子仁利
入山東候補通判著客游草

杭郡詩續輯古巢少慧好學星文算術推測最精兼熟于古今印法里居時與奚蒙泉陳秋堂余慈柏爲文字交最相契合

秋日過淨慈寺分韻

爲耽幽趣訪巖阿吟侶相期泛淺波竹樹淨涵山翠重寺門涼接水雲多半廊斜日鐘初動一徑秋香客乍過試就已公參活句渾忘暝色上煙蘿

吳履基

字厚庵號懶雲邦煥子仁和人著客窗雕蟲二卷

客中晚春

春事半闌珊濃陰漠漠寒重簾慵不捲一卷喜頻攤溪柳含煙重林花帶雨殘最憐雙燕子終日話檐端

徐

焯

字昭文仁和人

題諸彌亭榕齋詩鈔

年來心事向誰論
小巷人稀早閉門
無欲自能躋老壽
有書還可教兒孫
月移翠竹琴三疊
霜落紅蕒酒一尊
自笑風塵長碌碌
幾時翦燭共黃昏

楊

澄

字潔甫號嗜愚海甯諸生著成皋集

周勳懋曰嗜愚書畫

得瘦仙老人之傳

許維祥曰嗜愚先生少孤事母沈以純孝稱攻苦力學博覽羣籍詩思清麗惜髮後散佚塵有存者

寄友

別來彈指一星終
旅館懷人怨落紅
銀葉翻香春夢遠
金荃寫韻小詩工
翠寒鳳味君應記
簾捲鰕鬚月正中
入洛犬書猶未達
相思情緒在飄蓬

胡啟龍

字雲峯海甯貢生著愛蓮書屋詩草

管庭芬曰啟龍爲孝義德光之子家饒於資藝書甚富構雲峯別墅頗擅沐泉之勝與諸名流曠詠其中抗壘

浦太史流樞圖唐詩管主其家乾隆二十二年

南巡啟謨其子瑣錄詩稱
旨故拜文綺之

賜士林榮之

春星書屋小集同齊先生息園謝君青士作

槿籬深處冒春煙小集清尊意靜便田子湖磐山是癖章家
身世酒爲年鶯初雁晚同琴坐茶半香初稱午眠偶憶談書
良自適宋元精槩尙流傳

張廷梅 字羹苦號香
石嘉興諸生

送牧庵旋楚

三載兩離筵銜杯各惘然形容非舊日風雪似前年春色漢
陽樹歸心彭蠡船寒鐙耿無寐惜取對牀眠

馮鼎延 字聖調
烏程人

華蓋洞

曲折山岡下寒雲一帶松草邊纔得路竹裏忽聞鐘破寺
子我深潭中有龍芒屨拌踏破殘日已遙峯

謝天樞

字邦瓌象山諸生
著森玉堂詩藁

湯萼堂傳畧邦瓌博學高才尤工於詩余友姜君白巖
之高弟也白巖官石泉寄書邦瓌有三年之別造詣迥
異信山川足助學

問云年二十四卒

春夜

四時春最好更到夜沈沈朗月出松徑清風穿竹林山雲懸
遠盡天籟譜新琴不是幽閒客安知造物心

病中

白駒過隙顏難駐好似江流去不回試看眼前春幾許墮紅
落紫滿山隈

謝開家

字中封號桐山象山
人著夢草軒詩藁

徐時棟傳畧桐山性介幼好
治經從徐漪廬先生遊稱高弟

新秋夜獨坐

時序際新秋餘暑尙未歇披襟當涼風開簾延素月爽籟出
巖隈屑雲起林樾喜無塵事侵自覺清機發此意誰與論逍
遙且晞髮

趙

然字蘊山
山陰人

不寐

愁人無短夜展轉對孤檠蟲語有寒意江流多遠聲家貧成
浪迹身賤薄浮名自愧謀生拙當年未學耕

曉行

貪程先僕起侵曉促征輪殘月澹于水數峯青向人有時成
短夢無處問迷津儘有安眠者勞勞負此身

諸開泉

字璇源號秋潭餘姚廩貢官鎮海教諭著二研齋稟

朱珪曰見秋潭近作甚喜家學相承代起有人而科名之得失不與焉所詣益深所傳益遠不榮於區區科第哉乎

訪胡白水芹秀野草堂

出郭已百里言訪我友居我友居何所深山一舊廬謾設屋
上松灑灑屋下渠剝啄頻不應或疑此行虛君言閉門久今
日開爲予人言我岑寂孰知樂有餘出耕原上田入讀架上
書力田縱不獲經訓乃菑畬

郵醪爲我沽園韭爲我翦谿魚尺半弱自向湖中選時逢夏
之初百杯當春餞酒酣詩神速君詠我亦勉一幅百餘言乙
乙絲抽繭書箋供蠹食補壁任蝸篆自來著作家牛腰那能
輦先生歸烏有爾我亦不免何如且飲酒白雲共舒卷

桂千人

字伯英號曹源天台廩貢官上虞教諭

天台詩錄曹源博極羣書尤究心程朱之學手注大全詩經參考異說辨晰詳明姚江士習皆祖尚王氏於朱注不甚探求曹源至每值書院會課講明義理人喜爲之顏其堂曰理學真傳所著三友堂文彙齊息園少宗伯有跋

書與壻景泉

人生不滿百去日何茫茫卽令滿百年來日苦不長聖賢盡寂寞萬古遙相望吾輩貴乘時磊落懸清光道德崇實行虛聲薄文章遜志務時敏觀象法天行秉燭以繼日仰思夜未央

松隱居

林泉從所好暫憩卽爲家深翠環庭密遙峯入戶斜竹雞啼穀雨僊鼠拾松花物外無塵雜僧方瀹茗芽

凌世景

字方渠天台歲貢

天台詩存方渠先生爲制藝鉅手成宏之理隆萬之法兼而有之書法初學顏歐繼愛米襄陽且好爲人作書戶外履滿與梅魁菴齊名魁菴藐視一切不輕爲人捉筆而先生求無弗得以是人皆憚梅之嚴而樂先生之寬學者方之義渠先生云

南溪夜泛納涼

笑指南溪古渡行
乘桴閒泛月華明
半篙水長灘聲急
一幅雲橫塢樹平
夜久不嫌櫻履溼
涼生自解葛衣輕
行歌三兩相酬荅
沂水當年共此情

朱庚年

號檉園仙居人

客中感春

春郊一眺望
春風吹我衣
桑柘有生意
松杉多芳菲
客心胡不樂
好景轉相違
老妻憂我疾
兒子望我歸
無情爲草木
有

知明是非兩載隔情話親戚應歎歎沿江覓歸人竟傷見面
稀老人登長路作伴得所依迢迢千里家恨不能奮飛春來
日消瘦不比往者肥黽勉加餐飯且將楮墨揮縑爛不可學
平淡從天機以茲聊見志養頤貴知幾雲煙任模胡弗計高
眼譏

山寺

儘日棲山寺窗開四望明霜花浮野薄木葉下江輕地僻稀
人迹天空有雁聲莫因宋玉賦蕭索歎浮生

尋芳

病起尋芳興卻賒小橋流水幾人家我來春去無多日不見
桐花見槿花

吳希鎧

字衛士號函谷東陽廬
貢著容膝軒詩二卷

孫辰東傳畧函谷爲文書味盎然中丞嵇
公器重之謂近如吳匏菴遠如曾南豐
葉蓊序畧函谷詩風格和平
醇雅閱而不肆一如其人

山南田家

寸碧峙峽角澹蕩開斜暉不覺曠蒼宇牛羊顛翠微桑蠶後
先老麥雉高低飛我來野夫款竹秀山南扉雞黍畢晚飯兒
童卸春衣呼待月光好蓑笠穿煙歸庭榦花氣靜窗枝葉綠
肥惟應耦耕叟閒逸皆真機

晚自山莊至桃巖作

峽日欲暝山蒼然迢迢平野霏輕煙金精一綫挂林表東升
月魄弓初弦峴峯突兀暗青翠好從缺處窺長天支筇得得
遂幽討驚起宿鳥飛翩翩古洞唵呀風竄篠簾瀑展向空中
懸崖削兩稜卓馬耳峯竦寸碧巉爲肩砰磅激石水訇磕龍

拏虎攫居其巔亦有叢祠土囊口可以坐聽飛來泉遙空度
月月在水回照詩魄成飛仙盪胸了了淨塵滓空明一色同
清妍何來膚寸擘輕絮潑墨濃染雲藍箋興盡卻覓所來徑
林深谷黯難沿緣惟聞急雨落松籟點衣顆顆珍珠圓幸哉
山靈能解事回風爲我吹漪漣依舊流雲吐華月常儀顧影
愈嬋娟因之頗復悟人事瞬息何必無推遷不如歸家且呼
酒閉門月下長酣眠

何濟川

字作舟號遠
堂東陽人

樓上層曰遠堂通知經術年五十餘猶不釋卷詮疏十
三經遺義多所發明戴東山殿泗少所許可獨於遠堂
贊不容口詩於宮商不
必悉協而意軌于正

讀蔡中郎集

國典顛披盡不傳差欣獨斷有遺編談經人尙旗常勒論禮

家欽日月懸無復鴻都闕觀外徒教虎賁

借讀

愧樽前傷心

漢事知誰正此日通儒屬鄭元

頽風豈獨悼桓靈辜負高陽舊典型經世首排三互法澡身
肯污五原腥書緝聖壁纔飛白意式蘭臺未殺青不愧立碑
陳郭在只今人勒祖勳銘

馮

孚 字文異義
烏歲貢

讀宋潛溪集

過江宋潛溪志學破滄溟王

禱胡翰

尙不逮其餘焉足竝淵

源虎眼波製作龍文鼎經師中宮尊舊學前星爛可歎老投
荒徒勞福資冥名盛身不康途窮手難拯所以曳尾龜潛藏
恐不迴何必大文章上躡說與頌我讀先生書足已且尙綱

陳兆熊

字滑占號玉筍又號省閣天台
人乾隆壬午舉人著省閣詩草

天台詩錄省園爲南陔先生孫父廸亭與天台山寺僧
某善僧故以清修著一夕夢僧至舍化爲熊是夜省園
生抵明訪之則僧已圓寂遂名曰兆熊天姿頽異於昔
靡不貫澈經史諸子百家如大庖盈肺供其咀嚙爲文
蹕厲風發試輒冠其曹王午郊試座主彭芝庭尚書卽
其先操選拔者時稱其錫芥之契久困禮闈丙戌旣得
復失溫相國福蔭黃門載皆重其伉直厚遇之著有周
禮指掌圖考昭明文選注皆散佚惟詩彙若干卷存于
家又有完貞詩云青園一滴血白日爲鬼神燐
幸起鴛鴦冢入地諸冥姻真堪泣鬼神矣

秋日偕柳軒芸林聿修諸君遊太山慈喜寺

朝出城西門下馬飯香積虔誠禮名山須先戒肉食隄柳半
青黃秋水澄空碧西山望尙遠爽氣忽已逼頓覺囂塵清景
物分昭晰拳礪石路古奇峯巖徑仄牽蘿艱躋攀轉上憑腳
力一步一回顧我友方憩息行行橫嶺頭斷碣字剝蝕陟險
復坦平幽村頗岑寂牧童指前途榛莽互梗塞遙峯暮靄來
卻曲迷行色登眺指山巔豁然照慧日柳軒動高興芸林省

舊歷聿修亦忘疲疾行追我側山腰插浮圖亂石高七級入
寺聆梵音香細鑪煙直紺宇何輝煌展拜見佛骨真性久不
磨靈光燭四國憶昔在天台此理證無惑曾觀兩肉身成佛
由面壁一在紫凝閒一在水晶域如此合成三南北總歸一
見在與未來圓神不可測金有時而寒石有時而泐惟禪機
所到空處無非實脫屣示神奇亦或留形迹至今天太山對
之皆戰栗信知祇樹園妙法須造極惜我嬰世網塵緣未得
出往往愛逃禪浪遊每心惻敢言湖海英雄心偏難減屈指
同學輩聲名自赫奕落拓惟數子把臂相促膝逸興凌青雲
搜奇到石室維摩看散花冰雪入胸臆對酒作歌行淋漓恣
潑墨他日訪異蹤毋忘此遊展

吳淦

字超琦號菴齋錢塘人乾隆壬午順
天副貢官開化教諭著愛閒軒詩草

杭郡詩續輯菴齋叔祖性仇爽議論風發詩藁舊藏橫
河老屋屋茨橐亦燬今從竹洲秀衍續集錄出數首

入峽口占

四壁奇峯合中流帆影紛灘聲渾帶雨樹色直連雲虎迹埋
秋草猿嗥對夕曛輕橈徐轉處荆蜀嶺頭分

潼關

潼關直上勢岢峨三輔中分一髮遙萬里洪流環太華千尋
喬木鎖中條西連蜀道行逾險北顧燕山路漸饒

聖世豈分秦與晉好從百二漫揚鑣

張

培 號蓉並錢塘人乾隆癸未進士乙酉南巡
召試一等欽賜內閣中書官吏部郎中

題顧菴厓杏花江店圖

風光一路草萋萋指點斜陽送馬蹏無限閒情何處好青旗

野店小橋西

陶

煒

字宗翰號新甫會稽人乾隆乙酉舉人欽賜翰林院檢討

登秦望山

春山杖策晚風寒
疊疊晴嵐護翠巒
遠樹依稀雲外落
明霞縹緲水中看
登臨絕頂星辰近
俯瞰平原宇宙寬
秦石荒涼何處訪
撫松落日一盤桓

諸以敦

字長麓號愛堂錢塘人乾隆乙酉副貢官福建長樂知縣

吳振域傳畧長麓丈壯歲仕闈以憂歸卽不復出生平尚氣誼重然諾尤篤于戚族閒凡有誣謗靡不竭心力以赴之詩筆豪宕閒作小詞暮年鍵戶著書專攻史籍所著熊方後漢書年表校補東漢朔閏表已刊行尚有淮南子高注校補通志氏族畧辨證及吉莫吉齋叢藁未梓藏于家

旅舍聽雨

游倦翻嫌客路賒
旅窗風雨復交加
野田一夜足新水
山徑明朝踏落花
二月餘寒欺酒力
五更殘夢繞天涯
應知綠盡

王孫草一帶芊緜直到家

駱房山張辛齋孫雪帷李散牧同過吉莫吉齋小飲

寬鞋大扇接羅巾觸熱來過意轉親哆口縱談天下事拊膺
空愧病餘身小庭簾卷邀涼月高樹風多健酒人清興夜闌
猶未減好攜吟伴坐湖滸

施光輅

字靜方號柳南錢塘人乾隆
戊子舉人官四川敘州知府

吳振械曰柳南由考取中書軍機章京入直頗有勤能
之譽出爲荊州同知擢知施南府丁艱服闋再授敘州
知府值北塞用兵以遲悞軍饋遣戍伊犁因于塞外築
醒園有醒園十二詠越六年

賜環賞主事銜還家
年六十餘矣

醒園十三詠

萬里逢親舊相於促席談他鄉悲喜共多難別離諳已往嗟

何及從今唾亦甘家山歸有日還約結茅庵

天涯話
舊之堂

塞路春多雪還鄉夢亦迷因拈杜陵句聊向草堂題山崦梨

花雨湖孺燕子泥他時歸舊隱良友好相攜

青春作
伴齋

未有藏舟處浮生任久淹偏教遷客住錯怪老夫潛蘆戰秋

宵雨霞明晚市帘陸沈人海裏常對雪山尖

萍泊
舫

髣髴維摩室幽居意頗便規模存古道稜角忤時賢塞水艱

行李山花記歲年蒲團僅三尺閉戶學逃禪

方
庵

僅可容吾膝依山也縛茅求全遭物忌得半任人嘲天地蝸

牛舍春秋燕子巢客來慵揖讓差喜是貧交

半
亭

天末倚樓客哀筋不可聞秋風欺白髮鄉夢隔黃雲蕃落今

無事中朝方右文班侯應笑我垂老學從軍

倚
樓

豈善蘇門嘯名臺亦自豪九秋誰念遠萬里獨登高白日無

風雨青山敢遁逃放懷銷塊壘不復夢三刀

嘯
臺

雖然巖洞小許我抱雲眠空腹堪容物藏身不計年長來無

熱客半醉卽神汕何必華陽去迢迢訪稚川

小好洞天

池小流偏曲荷花種幾灣支橋通宛轉綠岸步鸞環巴水前

時渡之江夢裏還潺湲肯相送生入玉門關

曲池

四月垂楊綠天山雪漸消正當盤馬地特築跨虹橋有水來

芳沼無人盪畫橈濠梁今日意旅恨忽然銷

水來橋

魂逐盧耽去孤懷倍惘然山林完潔白風雨葬神仙華表歸

何日鸞盧伴幾年夜深松籟起思爾不成眠

塵鶴籠

底事長廊下清宵獨倚欄祇緣明月好如在故鄉看古戍煙

初散荒城漏未殘捲簾頻佇望裘敝不知寒

待月廊

王

詰字春及一字守之錢塘人乾隆戊子舉人

杭郡詩三輯守之善青烏術嗜飲戊子舉于鄉留寓京師甚久與汪首禾日章交最摯嘗偕讀書于報恩護國

寺

題雙松圖同亦庵

在五拜大夫在七稱處士前聞松可珍或若多斯美摩畫悟
卽真東蕪良所嘗展觀雙松圖對影中庭起喬幹待棲鸞交
讓頌連理畫師妙吉祥意美筆非詭磊砢奇節彰挺立蒼髯
子三徑客可過重棲聽足喜高齋小幅張揮塵許我爾

謝嘉玉

字美如號韞山山陰人乾隆
戊子舉人官河南夏邑知縣

家傳畧公天性孝友見義勇爲利害不能奪所著有公
穀撮要南北史擴言蟬食錄小學一隅學字編異駢字

書
集諸

樵斧

終歲自勤動百事隨所遭昨日負耒耕今日攜斧樵耕當在
隴首樵當厯山腰行行唱歌去白雲將我邀

姚宏變

號理齋錢塘增
生著蓮江集

借紱齋師招同人大明堂看梅

環寺皆山也飛花入洞天雲深藏佛日梅老過僧年曲引籬
邊路幽鳴竹裏泉梵音來斷續遙度一林煙

諸以瀉

字鄧門錢塘廩
生著浪游草

吳振械曰鄧門品端學邃館同里孫氏有年跬步必循
禮法會孫枝巖舍人歿於京邸家人欲返其喪無可屬
者商之鄧門卽慨然走三千里擊
其柩及細弱以歸孫氏至今德之

天津小泊

回首西山暮靄屯扁舟乘月下楊村洪流九派漚河道丁字
雙沽匯海門夾岸旌旗迷白晝滿船絲竹醉黃昏雍奴城畔
春陰好小泊河亭試討論

魏家灣晚霽

又向清平繫越舫淡煙疎靄雨初停雙飛社燕花前樂一色
春旗柳外青慙慙蒲帆依曲岸星星漁火亂遙汀誰人更倚
江城笛吹落梅花不忍聽

諸以惕

字念齋號愚庵錢塘諸生著愚庵詩稿

吳振棫曰愚庵嘗入八閩遊豫楚江淮隨游屐所經積詩成帙兼長古文爲一時名公卿所推許

仙霞嶺遇雨

仙霞最高處設險有重關風送無邊雨雲迷不盡山自經行
役苦方識里居閒願作垂綸者一灣秋水闊

程

潮字秋巖錢塘人

孫可堂爲其中表吳御臣隆元營葬詩以紀之

北邙之鬼夜夜嘯東家墳高西家低白楊衰草無新故青燐
淡月風淒迷玉魚金椀幾回出七十二冢洞無物速朽由來

羨至人姦雄已死猶癡絕亦知生寄死則歸形藏神化情無
違埋骨掩骼豈得已殘骸暴露良可哀吁嗟乎浮名終付貉
與狐要使土丰毋侵膚麥舟高義今猶昔莫謂純仁近代無

金世綬

字芑州號岫雲錢塘諸生著蜃閣詩錄

杭郡詩續輯岫雲丈老困名場性耽禪誦足迹不出鄉里湖山佳處輒與朋輩買醉行吟不知老之將至集中附刊蜃閣半解皆論詩之語於此中精微深有所見

過靈壽寺徐香巖讀書處

精舍石橋北苔階明反景譚笑雜鳥喧行坐亂林影溪聲搖
竹光蕩漾軒窗冷幽人方讀書萬籟此俱靜

安溪田舍

農夫邀我醉歸權溯溪灣野色延幽眺風威敵酒顏鳥嘯無
靜竹雲滅有遙山那及羣鷗樂飄飄不解還

陳祖蕃

初名景運又名堯字穉世號鴻軒仁和諸生

胡日榘曰鴻軒晚號古歡老人尚氣節嗜吟詠藝畧皆通工於楷隸畫壑印法亦洞其微而於脈神炊湯之經尤精

研討

題許榆村桐江垂釣圖

知者心自妙寄情流水閒滄浪歌未歇濠濮意何閒野荻遠
侵岸夕陽猶在山孤舟原不繫直欲釣鼈還

閉關

明知身是借天假一朝閒茶熟晨餐後鳥嘯午夢還攤書欣
放眼讀畫勝看山老大悲歧路何時可閉關

孫

炎

字詵伯號又然廷槐子仁和諸生著半畝秋齋詩草

杭郡詩續輯又然幼隨侍觀察公歷官滇楚迨觀察致仕家居又然年逾六十有萊子奉親之樂晚借里中詩老唱酬贈答以寫性靈風雲月露之詞非所好也

薄暮登荊州城樓作

落日挂城西登臨眼易迷潮聲喧草市人語隔沙隄地控秦
關壯山連蜀道齊從來征戰地悵望楚雲低

高樹穎

字茗發號實庵瀛洲子
仁和人著復齋詩集

四庫全書館贈錄得讀中祕所藏故其詩多純和醇粹之
旨

送何春渚徵君回里用光漱六孝廉韻

結客天涯願未酬相逢舊雨更綢繆最憐得食籠中雀擬學
忘機海上鷗紫蟹銀鱸剛入饌丹楓黃菊好移舟春風遲我
歸來早共溯仙源爲小留

高樹新

字青雨樹穎弟仁和
人官山東陽穀主簿

楊振鏞曰青雨與兄實庵善承家學均以詩名青雨七
言如入夜更看新上月將離還倚舊登樓鬢已漸蒼差

脫帽屢因屢折怕登

家居二首

巢居未可擬林逋今日承平往代無萬樹梅花一湖雪獨來
林下較清癯

時節剛逢三月三家家婦女共看蠶一篇葛澧錢塘賦好爲
杭州助雅談

吳錫福

字備五號介
石仁和諸生

秋夕

明月滿山城秋聲在庭樹獨坐一室閒曠然澹無慕惟見數
流螢飛飛自來去

王元鑑

號抑齋秀水歲貢
著鷺溪草堂詩稿

諸錦序畧抑齋具登高能賦之才抱
窮居不損之志詩品和雅無愧作家

全唐詩話雜詠

山厓容我作詩狂塵世浮名底事忙欲訪峨嵋尋偃月酒樓

誰識許高陽

許
藉

筆下龍蛇有警光撥鐙妙法肯相忘崔羣但自誇春榜悟否

先荒陸氏莊

陸希
聲

笑他辛苦論癡符但覓燕公記事珠誦得集中雙白鷺孫宏

還怕故人無

雍
陶

覩縷唐宮事百端禁中實錄不須刪誰於史外求餘韻惹得

宮詞滿世間

王
建

鐵獅行

在滄州舊城五代周世宗時
鑄此以鎮蛟龍遂無水患

金精之剛號狻猊還以金鑄形何奇空城五壘已蕪沒龐然

獨存百鍊姿驚沙飛捲欲搏象烈風晦冥如吞貔無山豈假

翳虎豹近海聞可驅虯螭天吳遁逃馬銜竈得此百倍三石
犀此鐵若鑄斬蛟劍焉能不動囚支祁

盛朝西域遠貢賚白澤往往來京師金牛通道已可鄙銅馬
垂式還堪嗤不寶異物猶卻獻萬年清晏安用茲何當鎔冶
作稼器使與耕牛秋馬同功施

戈溫如

字潤輝號韞石平湖
人箸適我廬詩鈔

中秋同人步月

風雨釀秋陰茲夕啟新霽明月隨人來清光溼衣袂裴王各
瀟灑胃次無淹滯仰視天宇澄商飈正淒厲行歌聽晚鴻秋
心渺無際

風生巖桂香露下庭草白一輪升海嶠千里濯冰魄巖城夜
如水往來希過客所欣素心人笑譚永今夕何處寺鐘鳴徘徊

徇遠天碧

谿上

兩足清谿上初晴一鳥嘯亂山茅屋小孤艇板橋低籬角看
新樹牆陰識舊題家家春酒熟留客醉如泥

葉

燦

字星若慈谿人
著星五詩草

范摅序畧星若先生詩性情獨

擊置之宋人集中幾亂楮葉
緝雅堂詩話星若詠蘭花云淡極都無戀低垂有所思
敗蘭云芳意半留夢好音多在琴皆不似塵中人語

過長溪嶺和意亭六弟韻

抱病懷歸別甬東山形愁倚劔函空平肩輿溼濛濛霧大布
衣飄翦翦風泐石飛泉垂練白枯桑野火落霞紅抑洪亭下
蝸廬小低鎖嵐煙望欲窮

謝天桂

字永芳號秋圃象山
歲貢著自鏡齋詩藁

倪象占傳畧丞芳性孝友兄樞柱俱早歿兩嫂氏青年
守志丞芳事之如禮並完節終乾隆壬子邑大祲破產
買米力振鄉里生平敦實行不
尚浮華詩文亦然年四十九卒

感舊

巖巖不可攀藹藹似可卽寸心當千古豈僅圖顏色美
且都中甯少白黑臨歧話猶新情懷難反側

送友人讀書洞巖僧舍

古哲惜寸陰後賢分亦竇感此階前冀時際春光老吾人志
聖賢豈貪林泉好翩翩美風度切切研文藻得失古自鏡蘊
蓄深懷抱閒看綠野耕所事一何早有秋望天成辛勤由人
造相期同努力羨君先聞道

西湖早春晚眺

煙靄橫空反照侵爽眸殘雪映高岑春光乍洩梅兼柳樂意

相關鶴與琴遠樹微茫懸日脚歸舟歛乃過湖心禪林止靜
疎鐘起激越錢江怒不禁

陶譽相

字觀堯號蕪圃會稽人官安
徽大安巡檢著蕪圃詩草

陶澍序畧蕪圃天資穎澈爲詩純以意行不事雕飾余
撫皖時聞其歷任靈璧亳州桐城遇災行振實事求是
及佐澂亦有政聲固
不必以詩才見矣

呼母崖

世人名利重遂覺膚髮輕咄哉呼母崖何以傳此名得非履
極險臨深念所生疾痛呼父母今古同此情小人亦有母欲
呼難出聲叱馭九折坂裏羶度陰平彼哉良有以問爾何所
營

祭歐陽文忠公祠

千載文章在孤亭山水中何人不能醉大雅獨推公野蔌盈

兩浙輶軒續錄補遺

卷二

陶譽相 范光裕 朱觀謨 王素嘉

禿

又川上

盤綠寒花拂檻紅年年齋春酒容我拜高風

范光裕

字作求號醒界上
虞諸生著留刪草

清明日有感

杯酒澆寒食春眠起故遲一窗開曉霧小雨搭楊絲望墓空
懸淚思親愧作兒不堪花外聽蜀魄正嘯時

朱觀謨

字孟典號師古天台
廩生箸烏石溪吟草

雜詩

東山多垂柳依依傍古宅柔條颺輕姿密葉聚深碧風月有
餘清遊者紛若織一朝霜露零樹下少行迹世情亦如此莫
訝翟公客

王永嘉

字嘉會號南
圃東陽諸生

王清渠曰叔幼失怙砥志讀書性
至孝館於外五日必一問母膳

夏六月遊桃花塢

晉代襟懷重一邱路迴風遞片雲流人家繞樹纔撐眼佛屋
嵌山半打頭洞小巧穿天宇罅僧聞探借雨窗秋可憐只此
清涼界不藉桃源繫客舟

村翁

緣溪陟巘兩三家恰恰當門似柳衙投老渾忘年七十半籬
春雨夢梅花

吳應世

字聖美號風庭東陽諸生著風庭集十卷

忘機

福兮禍所伏利則害之囹蛾謂得其燭雉乃罹於羅方覓楊
朱羊旋悲塞翁馬呼起九原人誰是忘機者

倪

恢字季子號爽庵浦江諸生

旅次感賦

亦知身世等蜉蝣容易光陰又暮秋貧賤詩文休自負流離
風雨只添愁百年故土論知己千里他鄉憶舊遊但有東陵
瓜可種邵平原不藉封侯

戴王徵

字遠山浦江人官安徽旴
胎縣丞著抱甕山房集

辛巳送春前一日諸同寅賞牡丹呈漁村呂太守

故土春銷檉岸茶可無芳訊到天涯昨宵中酒緣多病此日
行吟又賞花到郡韓琦堪報國思鄉王粲久離家瞻雲曠絕
三千里不見春萱轉自嗟

蔡宏勳

字銘士號食硯永嘉
貢生著雪齋詩外

周長發序畧食硯家故貧束髮嗜古有聲庠序兼工古
文詞旁及書畫直躡松雪雲林之室所爲詩酷摹東坡
與余同癖東園藝
林中號稱三絕

夜坐環綠草堂

靜夜坐幽齋窗牖自展懷峭風來半榻斜月轉空階煮茗山泉潔敲詩竹韻諧案頭塵不到一硯是生涯

東坡先生送春詩有欲將詩句絆餘暉之句因續之爲留春詩

欲將詩句絆餘暉止惜春光駐緩歸雨砌空時花已謝風簾捲處燕仍飛思來騷客一攜酒還向芳園十叩扉聊喜垂楊能解意綠煙嫋嫋陌頭霏

兩浙輶軒續錄補遺卷二